

ՎԻՄԱԳՐՈՒԹՅՈՒՆՆԵՐ ՎԱՀԱՆԱՎԱՆՔԻ 1970—1978 ԹԹ. ՊԵՂՈՒՄՆԵՐԻՑ

Պատմ. գիտ. թեկնածու Գ. Մ. ԳՐԻԳՈՐՅԱՆ

Հայ վիմագրության մեջ առանձնակի արժեք են ներկայացնում նաև հիշատակագրային (մեմորիալ) կոթողների արձանագրությունները, որոնցով այնքան հարուստ է Հայկական լեռնաշխարհի տարածքը: Իբրև պատմական սկզբնաղբյուրներ, այդ վկայագրերը հաճախ հազվագյուտ տեղեկություններ են պարունակում ոչ միայն հանգուցյալ անձանց ինքնության կամ կատարած գործերի մասին, այլև արտացոլում են տվյալ ժամանակահատվածի հասարակական-քաղաքական հարաբերությունների իրական պատկերը: Այս ուղղմով հատկապես ուշագրավ են Սանատինի, Հաղբատի, Գանձասարի, Ամաղուի նորավանքի և բազմաթիվ այլ պատմաճարտարապետական հուշահամալիրներում գտնվող տոհմական դամբարանատների մակագրությունները:

Ինչպես հայտնի է, Վահանավանքը X—XI դդ. եղել է ոչ միայն հոգևոր և կրթական-մշակութային օջախ, այլև հանդիսացել է Բաղքի Ջազիկյան իշխանների, ապա նաև Սյունյաց գահակալների տոհմական դամբարանատուն¹: Պեղումների շնորհիվ այստեղ հայտնաբերվել են Վահան նախաշինողի, Վաչագան իշխանի մայր Խուշուշի, իշխանաց իշխան Աշոտի (Աշոտիկի), Զնանշեր Ջազիկյանի և բազմաթիվ իշխանազունների ու հոգևոր գործիչների տապանաքարերը:

Վահանավանքի մեծ տաճարի սյունասրահի և ենթադրյալ սեղանատանմարբման աշխատանքների ընթացքում հայտնաբերվեցին մի շարք արձանագրություններ, որոնք առավել ընդլայնում են մեր պատկերացումները միջնադարյան Սյունիքի և, մասնավորապես, Հայոց արևելից կողմանց՝ Աղվանքի պատմական դեմքերի ու դեպքերի մասին: Նորահայտ վիմագրերում հիշատակված անձերից ոմանք վկայված են XIII դարի ականավոր սլամոմիշ Ստեփանոս Օրբելյանի գրական ժառանգության մեջ:

Այսպես, ենթադրյալ սեղանատան ներսը մաքրելիս ի հայտ եկան շինարարական բնույթի ծավալուն արձանագրության երեք խոշոր բեկորներ, որոնց համադրումը ցույց տվեց դրանց՝ միևնույն բնագրի առանձին հատվածներ լինելու փաստը: Այդ համոզման են հանգեցնում ոչ միայն պատմական միևնույն անձերի հիշատակությունները, այլև լեզվաոճական ու գրչական առանձնահատկությունները (ուսա երկհնչյունի մեջ ու-ի վերածումը վ-ի, կցագրերի

¹ Մետեփաննոսի Սիւնեաց եպիսկոպոսի Պատմութիւն տաւնն Սիւսական», ի լոյս ընծայեաց Մկրտիչ Էմին, Մոսկվա, 1861, էջ 175 (այսուհետև՝ Ստ. Օրբելյան): Այս հարցի մասին տե՛ս Գ. Մ. Գրիգորյան, Վահանավանքի պեղումների նախնական արդյունքները (1956—1970), ՀՍՍՀ ԴԱ «Լրաբեր» (հաս. գիտ.), 1970, № 10: նույնի՝ Новонайденные надписи Ваанаваика. «Պատմա-քանասիրական հանդես», 1972, № 1: նույնի՝ Ստեփանոս Օրբելյան, «Պատմա-քանասիրական հանդես», 1976, № 4:

² Վահանավանքի մեծ տաճարի հարավ-արևմտյան հատվածում պեղումներով բացված 22-րդ մակերես ունեցող սենյակը պայմանականորեն անվանում ենք սեղանատուն:

բացակայությունը, նույն բառերի հապավման առկայությունը, տառատեսակների նույնականությունը և այլն)։ Ռևև քննարկվող արձանագրության սկիզբն ու միջնամասի առանձին բառակապակցություններ բացակայում են, սակայն դրանք ըստ էության չեն խանգարում բնագրի ամբողջականությունը վերականգնելուն, մանավանդ երբ նմանառիպ բանաձևով սկսվող այլ արձանագրություններ առկա են Վահանավանքում։

Առաջին սալաքարի սկզբնամասն սկսվում է՝ «...ՈՒՍՏՐ ՍԵՒԱԴԱԻ ԱՂՎԱՆԻՅ ԱՐՔԱԻ...»։ Երկրորդ սալաքարը, որ անշուշտ առաջինի շարունակությունն է, սկսվում է «...ՈՒՍԻՆ ԳՐԻԳՈՐՈՅ...» կապակցությամբ։ Պատմագիտական գրականությունից հայտնի է, որ «Աղվանից արքա Սևադան» (Սահակ Սևադա I-ի թոռը) ունեցել է և՛ ուստրեր, և՛ դուստրեր, որոնցից Շահանդուխտը, Կատան և Սենեքերիմը (Սենեքերիմ I Սյունյաց թագավոր) իրոք ապրում էին Կապան քաղաքում և այստեղ էլ կնքել են իրենց մահկանացուն։ Եվ քանի որ ՈՒՍԻՆ բառը առանց որևէ կասկածի վերականգնում ենք ԱՄՈՒՍԻՆ, հետևաբար, ՈՒՍՏՐ-ի փոխարեն պետք է վերծանել ԴՈՒՍՏՐ։ Ուրեմն, այս հատվածը առանց երկմտելու կարելի է վերականգնել. [ԵՍ ՇԱՀԱՆԴԱԻՆՍ ԴՈՒՍՏՐ ՍԵՒԱԴԱԻ ԱՂՎԱՆԻՅ ԱՐՔԱԻ [ԵՒ ԱՄ]ՈՒՍԻՆ ԳՐԻԳՈՐՈՅ ՈՐԴԻՈՅ ԱՇՈՏԱՅ...։ Իբրև կովան, որ իսկապես այս վերականգնումը ստույգ է և հավաստի, կարող ենք վկայակոչել Վահանավանքի կրկնահարկ դամբարան-եկեղեցու հարավային պատի արձանագրության սկզբնամասը, որ միևնույն կապակցությունը կրկնված է ընդամենը երկու բառի տարբերությամբ «...Ես Շահանդուխտ դուստր Սևադ/աի Աղվանից թագավորի և ամուսին Գրիգոր թագաւորի որդո Աշոտկա...»³։

Երկրորդ սալաքարի առաջին տողը վերջանում է «Ի ՆԵՂ...» պակասավոր գրությամբ, իսկ առաջին սալաքարի երկրորդ տողը սկսվում է «ԵՒ ՇԱՆՐ ԱՇԽԱՏՈՒԹԵԱՄԲ» բառերով։ Այս երկու կապակցությունների միջև տրամաբանական է վերականգնել «Ի ՆԵՂՈՒԹԵԱՆ ԺԱՄԱՆԱԿԻՍ ՄԵՐՈՒՄ» բառաշարը՝ ԲԱԶՈՒՄ⁴ արտահայտությամբ հանդերձ։ Այսպիսով, քննարկվող հատվածը կարելի է վերծանել՝ «Ի ՆԵՂՈՒԹԵԱՆ ԺԱՄԱՆԱԿԻՍ ՄԵՐՈՒՄ» «ԲԱԶՈՒՄ ԵՒ ՇԱՆՐ ԱՇԽԱՏՈՒԹԵԱՄԲ», շարունակելով՝ «ԵՍ ԵՒ ՍԻՐ...», մեծ սալաքարին՝ «ԵԼԻ ՔՈՅՐ ԻՄ...», այսինքն՝ «ԵՍ ԵՒ ՍԻՐԵԼԻ ՔՈՅՐ ԻՄ [ԿԱՏԱ]...»։

Հաջորդ սալաքարին փորագրված է 3 տող, որոնցից առաջինը վերջանում է «ԶԵԿԵՂԵՑԻՔՍ Զ...» կապակցությամբ։ Այն հիմք է տալիս Լևոնդրելու, որ զ-ն, իբրև հայցական հոլովի նախդիր, պահանջում է շինեցա՛մ բայի համար ուղիղ խնդիր, որպիսին կարող են հանդիսանալ «ԶՍԲ ՅԱՐՈՒԹԻԻՆ ԵՒ ՍԻՐՈՆ» հատուկ անունները, այսինքն՝ «ՇԻՆԵՑԱՔ ԶԵԿԵՂԵՑԻՔՍ ԶՍԲ ՅԱՐՈՒԹԻԻՆ ԵՒ ՍԻՐ ՍԻՐՈՆ» (երկրորդ անվան զ նախդիրը չի կրկնված)։ Եռատող սալաքարի հաջորդ տողը վերջանում է Ի-ով, որ նույնպես նախդիր է, և քանի որ երկրորդ տողը սկսվում է «ՈՒԹԻԻՆ ՄԵԶ» կապակցությամբ, առաջարկում ենք վերականգնել «Ի [ՓՐԿ]ՈՒԹԻԻՆ ՄԵԶ ԵՒ ՅԻՇԱՏԱԿ Յ/ԱԻԻՏԵՆԻՅ ԳՐԻԳՈ...», իսկ մեծ սալաքարին՝ «ՐՈՅ...», այսինքն՝ ԳՐԻԳՈՐՈՅ։ Այսպես շարունակվում է՝

3 Տե՛ս «Դիվան հայ վիճագրության», պրակ II, կադմեց Ս. Գ. Բարխուդարյան. Երևան, 1961, էջ 138։

4 Կամ տֆնաչան, անձանձիւ և նման բառեր։

«Ե՛ի ՍԲ ԱՅԱԾԻՆՆ Ե՛ի ՆԱԽԱՎԿԱՅՆ Ի ՔԱ...», եռատող սալաքարի երրորդ տողն սկսվում է «ԻՈՒԹԻԻՆ Ե՛ի Ի ՊԱՀՊԱՆՈՒԹԻԻՆ» կապակցությամբ, որ համադրելով մեծ սալաքարի երրորդ տողի հետ՝ կունենանք. «Ի ՔԱՒՈՒԹԻԻՆ Ե՛ի Ի ՊԱՀՊԱՆՈՒԹԻԻՆ Ե՛ՂԲԱԻՐ ՄԵՐՈ ՍԵՆԵՔԱՐԵՄԱՅ...»: Բնադրի մնացած մասը փորագրված է մեծ սալաքարին:

Այսպիսով, համադրելով սալաքարերի բոլոր բեկորները, կստանանք արձանագրության հետևյալ պատկերը.

[...ԵՍ ՇԱՀԱՆԴՈՒԽՏ ԴՅՈՒՍՏՐ ՍԵՒԱԴԱԻ ԱՂՎԱՆԻՑ ԱՐՔԱԻ [Ե՛ի ԱՄ]-ՈՒՍԻՆ ԳՐԻԳՈՐՈՅ ՈՐԴՈՅ ԱՇՈՏԿԱՅ Ի ՆԵՂ[ՈՒԹԵԱՆ ԺԱՄԱՆԱԿԻՍ ՄԵՐՈՒՄ ԲԱԶՈՒՄ] Ե՛ի ԾԱՆՐ ԱՇԽԱՏՈՒԹԵԱՄԲ ԵՍ Ե՛ի ՍԻՐԵԼԻ ՔՈՅՐ ԻՄ [ԿԱՏԱ] ՇԻՆԵՑԱՔ ԶԵԿԵՂԵՑԻՔՍ ԶՍԲ ՅԱՐՈՒԹԻԻՆ Ե՛ի ՍԲ ՍԻՈՆ Ի [ՓՐԿ]ՈՒԹԻԻՆ ՄԵ՛Ղ Ե՛ի ՅԻՇԱՏԱԿ Յ[ԱԻԻՏԵՆԻՑ ԳՐԻԳՈՐ]ՈՅ Ե՛ի ՍԲ ԱՅԱԾԻՆՆ Ե՛ի ԶՆԱԽԱՎԿԱՅՆ Ի ՔԱՒՈՒԹԻԻՆ Ե՛ի ՊԱՀՊԱՆՈՒԹԻԻՆ [Ե՛ՂԲԱ]ԻՐ ՄԵՐՈ ՍԵՆԵՔԱՐԵՄԱՅ Ե՛ի ԻԻՐ ԽՐԴՈՅՆ Ի ՓՐԿՈՒԹԻԻՆ ՅԵՐԿԱՐԿԵՆԴԱՆՈՒԹԵԱՆ ՊԱՀՊԱՆ ՆԵՐԿԱՅԻՄՍ Ե՛ի ԲԱՐԵԽԱԻՍ ՅԱՊԱԴԱՅՍՆ»:

Արձանագրության թվականը, որ եղել է սկզբում, բացակայում է, սակայն հիշատակված անունների միջոցով կարելի է վերականգնել փորագրության մոտավոր ժամանակը: Այսպես, «Աղվաւից արքա» Սեադայի դուստր Շահանդուխտը, ինչպես կտեսնենք ստորև, մահացել է 1116 թ.⁵: Աշոտի որդի Գրիգորը (Գրիգոր I Սյունյաց թագավոր, մահ. 1072 թ.) Սմբատ II թագավորի (մահ. 1051 թ.) կրտսեր եղբայրն էր, իշխանաց իշխան Աշոտի (Աշոտիկի) երկրորդ գահակալ դավակը: Հիշատակված «քոյր Կատան» մահացել է XI դարի վերջերին կամ XII դարի սկզբին: Նա թաղված է Վահանավանքի մեծ տաճարի սուրնասրահի կենտրոնական հատվածում: Սենեքերիմը Սյունյաց թագավոր Սենեքերիմ I-ն է, որ հաջորդեց Շահանդուխտի ամուսին Գրիգորին: Արձանագրության փորագրության ժամանակ նա ողջ է եղել. «...ի քաւութիւն և պահպանութիւն եղբար մերո Սենեքարեմայ»: Սենեքերիմը մահացել է 1094 թ., կամ 1096 թ. և թաղվել է Վահանավանքում: Ուրեմն՝ արձանագրությունը վիճաբանվել է մինչև այդ թվականները: Ակնարկված է Սենեքերիմի որդիների մասին: Դրանք շորսն են՝ Գրիգոր (Գրիգոր II Սյունյաց թագավոր, մահ. 1166 թ.⁶), Սմբատ (մահ. 1166 թ.⁷), Սեադա և Կյուրիկե (մահ. 1099 թ.⁸):

Արձանագրության վկայությամբ Շահանդուխտ թագուհին իր քոյր Կատայի հետ կառուցել է 4 եկեղեցի՝ Ս. Հարություն, Ս. Սիոն, Ս. Աստվածածին և Ս. Նախավա: Այս եկեղեցիներից Վահանավանքի տարածքում գտնվում է Ս. Աստվածածինը (կառուցվել է 1086 թ.):

Ենթադրյալ սեղանատան արևմտյան լուսամուտին, մեղ անհայտ նորոգումներից մեկի ժամանակ, իբրև բարավոր էր օգտագործվել պարզունակ գլժախաշով մի ժայռաբեկոր, որի հարթեցրած մակերեսին փորագրված է Ց տողանոց հետևյալ արձանագրությունը.

⁵ Ս տ. Օրբելյան, էջ 245:

⁶ Բ տ. Օրբելյան, Ողբ և հառաչանք..., Կապաթա, 1846, էջ 17—18:

⁷ Նուն տեղում:

⁸ Գր. Գրիգորյան, Վահանավանքի պեղումների նախնական արդյունքները, էջ 89:

Թ[ՈՒԱԿԱՆԻՆ] ՆՂԱ (1042) ԶԿԱՆԳՆ/ՈՂ ՍԲՈ ՆՇ/ԱՆԻՍ ԶՍԱՐԳ/ԻՍ ՆՎԱՍՏ Կ/ՐԱԻՆԱԻՈՐ ՅԻՇԵԱ ՔՍ ԵՒ ՈՂ/ՈՐՄԵԱ ՆՄԱ:

Հիշատակված Սարգիս կրոնավորի ինքնության մասին այլուստ տեղեկություններ չունենք. կարելի է ենթադրել, որ այս հոգևորականը Սյունյաց Սմբատ II թագավորի գահակալության տարիներին եղել է Վահանավանքի միաբանության անդամներից մեկը և վախճանվելուց հետո թաղվել է նույն վանքի դերեզմանոցներից մեկում: Նորոգումների ժամանակ նրա գերեզմանի վրա կանգնեցված խաչքարը իբրև շինարար ծառայեցրել են բարավորի փոխարեն⁹:

Սեղանատան փլատակների մեջ պեղումների ընթացքում հայտնաբերվեց երեսույստման կոփածո մի սալաքար (85×60 սմ), որ ունի հիշատակագրափն չորստողանոց հետևյալ արձանագրությունը.

«ՅԻՇԵ[Ս]ԶԻՔ ԶՇԱ/ՀԱՆԴՈՒԽՏ ԱՌ/ԱԶԻ ԶԵՆԼՈՅՆ/ Ք[ՐԻՍՏՈՍ]Ի»

Հիշատակվածն, անկասկած, Սյունյաց թագուհի Շահանդուխտ II-ն է, Գրիգոր I թագավորի կինը, որի շինարարական գործունեության մասին հիացմունքով է արտահայտվում պատմիչ Ստ. Օրբելյանը: Շահանդուխտ II թագուհին մահացել է 1116 թ. և թաղվել է Վահանավանքի դամբարանատանը¹⁰:

Արձանագրության մեջ գրաբարի ստորագասական եղանակի երկրորդ ապառնի հոգնակի երկրորդ դեմքով կիրառված յիշեսջիբ բայը գրիչը փորագրել է առանց ա-ի: Նույն իրականությունը նկատում ենք ենթադրյալ սեղանատան հարավակողմում գտնված երկու տապանաքարերի արձանագրություններում:

Առաջինում կարդում ենք.

Թ:Շ:Ծ: (1101) /ԶՈՒԻԹԱ Յ/ԱՂԱԻԹՍ/ ՅԻՇԵԶԻՔ.

Մյուս արձանագրությունն է.

ԹՎ. :Շ:Ծ:Ա: (1102) ՀԱՅՐ /ԳՐԻԳՈՐ ԵՐԻՑՈ[Ի] ՎԱՆԱՑ ԱՌԱԶՆ/ՈՐԴ ՈՒԽՏԻՍ ՅԻՇ/ԵԶԻՔ ՅԱՂԱԻԹՍ.

Հիշատակված Զուիթայի մասին առայժմ ոչինչ ասել չենք կարող: Հավանաբար, նա եղել է Վահանավանքի միաբանության անդամներից մեկը և վախճանվելուց հետո թաղվել է այստեղ: Երկրորդ տապանաքարի հայր Գրիգորը ձնունդով եղել է Երիցուվանքից (Այժմ՝ ՀՍՍՀ Ղափանի շրջանի Արծվանիկ գյուղ), առաջնորդել է Վահանավանքում («առաջնորդ ուխտիս») և 1102 թ. վախճանվելով՝ թաղվել է այստեղ:

1977 թ. հունիսին մեծ տաճարի հյուսիսային հատվածը պեղելիս հայտնաբերվեց կարմրավուն ժայռաբեկորից կերտված մի խաչքար (140×80 սմ, հաստ. 15—17 սմ, նկ. 1), որի կենտրոնում խոր ակոսներով քանդակված է դծախաչ, իսկ շուրջը եղերում է մեկտողանոց հետևյալ արձանագրությունը.

⁹ 1968 թ. երկրաշարժի ժամանակ ենթադրյալ սեղանատան արևմտյան պատը մասամբ փլուզվեց, իսկ խաչքարն ընկավ այս կառույցի սալարկված հատակին: Այժմ անվնաս վիճակում նույն տեղում է:

¹⁰ Ստ. Օրբելյան, էջ 245:

ԹՎ. ՆՁԲ (1033). ՅԻՇԵԱ ՔՍ ԱԾ ՁՍՏԵՓԱՆՆՈՍ ԵԿԵՂԵՑՊԱՆՆ¹¹:

Վահանավանքի X—XI դդ. վիմագրերում հիշատակված են մի շարք Ստեփանոսներ, սակայն Ստեփանոս կաթողիկոսից բացի ոչ մեկը չի հիշատակված հոգևոր կոչմամբ կամ պաշտոնով: «Եկեղեցական» արտահայտությունը վկայում է, որ այս Ստեփանոսը վանահայր է եղել Վահանավանքում XI դարի առաջին տասնամյակներին:



Նկ. 1.

Մեծ տաճարի նույն հատվածը պեղելիս թերթաքարե ժայռաբեկորի վրա հայտնաբերվեց մեկ այլ արձանագրություն. խաչքարի (110×44 սմ, հաստ. 10 սմ) ուղղանկ գծախաչի վերին հորիզոնական հարթության վրա թվականն է, ցածում, ձախակողմյան մասում, միջին մեծության տառերով փորագրված է հետևյալ արձանագրությունը.

Թ. ՆԺԴ (965) /ՍՏԵՓ/ԱՆՈՍ/ՅԻՇ/ԵՅԷ/Ք:

Այս Ստեփանոսի վերաբերյալ այլուստ որոշակի տեղեկություններ չունենք, թեև կարելի է ենթադրաբար նրան նույնացնել 957 թ. խաչքարերից մեկի արձանագրության մեջ հիշատակված մեկ այլ Ստեփանոսի հետ:

Վահանավանքի ուշ միջնադարյան գեղամանոցի տապանաքարերի մեջ 1977 թ.

պեղումների ընթացքում գտնվեց մեկ այլ, արտաքնապես անշուք խաչքար՝ կերտված գորշավուն թերթաքարից, որի ճակատալին մասը, ուր հավանաբար պետք է լինեն թվականը, եղծված է: Մակայն աջակողմյան կոտրված բեկորի համադրումից պարզվեց, որ նրա վրա եղած ՆԾՁ (1007) թվականը վերաբերում է միևնույն խաչքարին: Ուրվագծված եռաստիճան պատվանդանի, ինչպես և ուղղահայաց ստորին խաչքանի աջ և ձախ եզրերին փորագրված է.

Ձ/ԱՆ/ԴՐԷ/ԱՍ/ ՔԱՀԱՆԱ ՅԻՇԵ/ԱՅ Ք[ՐԻՍՏՈ]Ս

Թ/Ն/Ծ/Ձ/ (1007):

Նույն տեղամասում, փլատակների մեջ, կամարակապ զավթից մոտավորապես 20 մ հեռավորությամբ ի հայտ եկավ կարմրավուն գրանիտե ժայռաբեկորից կերտված մեկ այլ տապանաքար (120×88 սմ, հաստ. 18 սմ), որի վրա խոշոր տառերով փորագրված է երեք տող.

ՁՎԱՀԱՆԻ/Կ ՅԻՇԵՅԷՔ/ Թ:Շ:Խ:Թ: (1100):

Հիշատակված Վահանիկը ժամանակագրական առումով ոչ մի առնչություն չունի Վահան Նախաշինողի կամ նրա եղբորորդի Վահան կաթողիկոսի հետ, որի աճյունը 972 թ. ամփոփվել է Վասպուրականի Չորո վանքում: Ամենայն հավանականությամբ, այս անձը եղել է Սյունիքի աշխարհական իշխանագուհիներից մեկը, քանի որ թաղվել է Բաղաց աշխարհի տոհմական դամ-

¹¹ Խաչքանի արանքում դժվարությամբ ընթերցվում է «ՈՐ ԿՈՉԻ ԽԱՀՐԱԿ» կապակցությունը, սակայն այս վերծանությունը թեական ենք համարում:

բարանում՝ Վահանավանքում: Նշելի է Վահան անվան փաղաքական ձևի կիրառությունը, որ այնքան հաճախակի է Սյունյաց տարածքի, մասնավորապես Վահանավանքի, վիճաբանում:

Հիշյալ սեղանատան հյուսիսային պատը ներսից մաքրելիս գտնվեց մեկ այլ արձանագրություն, փորագրված դեռևս անհայտ խաչքարերից մեկի վերուստ փոսիկավոր ուղղանկյուն-քառանկյուն պատվանդանի վրա: Ահա դրա զրազիրը.

Թ[ՈՒԱԿԱՆՆ]: Ն: ՂԸ (1049) էՐ. ՅԻՇԵԱ ՔՍ ԶՄՈՒՍԵ՝ ՈՐԴԻՄ ԱԲԼ ԲՇՐԻ, ԵՒ ՈՂՈՐՄԵԱ ՆՄԱ ՏՐ ԱՄ:

Հրապարակվող այս արձանագրությունը ուշադրություն է գրավում առավելապես լեզվաոճական առանձնահատկություններով: Բանն այն է, որ ուղի՝ բառը գործածված է հայերեն, իսկ հայրը՝ արաբերեն՝ ԵՐԼ կամ ԵՐՈՒ: Ուրեմն՝ հիշատակագրողը խնդրում է հիշել՝ հայր Բշրի որդի Մուսեին (Մովսեսին): Այնուհետև՝ Մուսե անվան վերջնահանգ Ե-ն պետք է լիներ է, իսկ Բշրի ուղիղ ձևը Բշար է¹²:

Աբլ Բշարի (Բշրի) և նրա որդի Մուսեի մասին մատենագրական և վիճաբարական տեղեկություններ մեզ հայտնի չեն: Կարելի է վերապահությամբ կարծել, որ նրանք ծագումով եղել են Հայոց արևելից կողմանից, ուր ԵՐԼ կամ ԵՐՈՒ հարադրությամբ պահպանվել են մի շարք անուններ (հիշենք Առանշահիկների խիզախ զորապետ Սասյի աբու Մուսեին և այլոց) հատկապես IX դարից: Ամենայն հավանականությամբ Աբլ Բշրի որդի Մուսեն (Մովսեսը) եղել է Սյունիքի Սմբատ II թագավորի ազատներից և մահվանից հետո թաղվել է Վահանավանքի իշխանական գերեզմանոցում:

Մեծ տաճարի սյունասրահում հայտնաբերված տապանագրերից մեկը կադմված է ՀՐԱՆՈՇ բառից: Ուշադրության է արժանի գերեզմանի տեղադրությունը. այն գտնվում է իշխանաց իշխան Աշոտի (Աշոտիկի) թագակալ որդիների Սմբատ II-ի և Գրիգոր I-ի տապանաքարերի մեջտեղում: Հրանոշի (Հրանոշի) ով լինելու առեղծվածը թողնելով ապագային, ենթադրաբար ներշնչել է, որ նա, անտարակույս, եղել է հիշյալ թագավորների մերձավորազույն ազգականահին, թերևս մայրը, քույրը կամ Սմբատ II-ի կինը:

Որոշակի արժեք է ներկայացնում Սյունիքի Սմբատ II թագավորի տապանաքարը (210×90 սմ): Այն գտնվեց մեծ տաճարի սյունասրահի արևելյան հատվածում 1976 թ.: Հարթ սալաքարին փորագրված է երկու տող (նկ. 2):

ՍՄՊԱՏ ԹՄԱԿԱՆՈՐ: ԹՎ:Շ: (1051):

Սա, անշուշտ, Սմբատ II թագավորն է, որիցոր I-ի եղբայրը, իշխանաց իշխան Աշոտի ավագ որդին, որը, պատմիչի խոսքերով ասած՝ «կալեալ թաղաւորութիւնս ամս ինչ՝ վախճանի և դնի ի Յովհաննու (իմա՝ Վահանու—Բ. Գ.) վանս առ դրան տաճարին»¹³: Մենք ունենք որոշակի վկայություններ, որ սա իսկապես Սմբատ II-ն է և ոչ Սմբատ I-ը: Ստ. Օրբելյանը մատնանշում է, թե որտեղ են թաղված Սմբատ I-ը և նրա որդի Վասակ թագավորը՝ «Յաւուրս սորա (Սյունյաց Հակոբ Բ եպիսկոպոսի—Գ. Գ.) վախճանի Սմբատ»

¹² Հ. ր. Ահա ոյան, Հայերեն արձատական բառարան, հատ. Ա, Երևան, 1971, էջ 73:

¹³ Ստ. Օրբելյան, էջ 233:

Սինեաց տէր, որդի Սահակայ, և դնի ի հանգիստ յնպիսկոպոսարանին Տաթևոյ»¹⁴։ Սմբատ I-ի՝ Տաթևի հանգստարանում թաղվելու պարագան Սյունյաց պատմիչը հաստատում է իր «Պատմութեան» մեկ այլ հատվածում. «Եւ յետ բազում երեւիլի արքունական գործոց վախճանի (Սմբատ թագավորը—Գ. Գ.) և դնի ի մեծ սրբարանին Տաթևոյ բազում և աշխարհագումար հանդիսի»¹⁵։ Տաթևում է թաղված նաև նրա որդին՝ Վասակ I-ը. «Եւ պա վախճանի Վասակ թագաւոր և դնի ընդ հօր իւրում Սմբատայ»¹⁶։



Նկ. 2.

Մեջբերված տեղեկություններն այլևս երկմտելու տեղիք չեն տալիս որ Սյունյաց առաջին թագակիր Սմբատն ու նրա որդի Վասակ թագավորը՝ Բագրատունյաց թագուհի Կատրամիդեի հայրը, թաղված են եղել Տաթևի վանքում, իսկ Սմբատ II-ն ու նրա հարազատները՝ Կապան քաղաքի սրբունական դամբարանում՝ Վահանավանքում։

Սմբատ II-ի գործունեության վերաբերյալ մեզ են հասել բավականին ընդարձակ տեղեկություններ։ Վաղագույն հիշատակությունը պահպանվել է այժմյան Սիսիանի շրջկենտրոնում գտնվող Սյունի վանքի 1017 թ. փորագրված վիմագրություններից մեկում, ուր նա հանդես է գալիս դեռևս առանց որևէ պատվանունի.

«Թվ. Նկ9 (1017)/. Սմբատ որդի տն Աշ/ոտո Ս[իւն]եաց իշխանաց/ իշխանի յսղա/ւթս իշեցէք»¹⁷։

¹⁴ Նույն տեղում, էջ 213։

¹⁵ Նույն տեղում, էջ 220։

¹⁶ Նույն տեղում, էջ 233։

¹⁷ «Իսկան հայ վիմագրության», պրակ II, էջ 89։

ներկրորդ վկայությունը վերաբերում է Հայոց 468 (1019) թ., երբ նա իշխան տիրապետում էր եղբայր Գրիգորի հետ իբրև վկա ստորագրում է Սյունյաց վասակ թագավորի հրամանագիրը. «ես Սմբատ իշխան վկայ եմ իմ քեռույս¹⁸ աստուածապետական թագաւորիս հրամանացս, զոր չկարէ որ խախտել»¹⁹:

Ստ. Օրբելյանը նշում է Սմբատի, ապա նաև Գրիգորի՝ Սյունյաց գահին բազմելու որոշ մանրամասներ: Ինչպես հայտնի է, Սյունյաց վասակ թագավորն ուներ միայն մեկ դուստր՝ Կատրամիդե (կամ Կատրանիդե) անունով, որն ամուսնացած էր Գագիկ I Բագրատունի թագավորի հետ: Եվ քանի որ Սյունյաց տիրակալը «ոչ ունէր ժառանգ տէրութեանն՝ թագաւորեցուցանեն Վսմբատ որդի Աշոտոյ»²⁰, Սյունյաց պատմիչը զրկատանքի խոսքերով է ներկայացնում Սմբատ թագավորին: «Բայց Սմբատ,— գրում է նա,— առաւել էր քաղցր և հեզահամբոյր և հարկու յամենայն շրջակայ ազգսն»²¹: «Շրջակայ ազգսն» ասելով՝ Ստ. Օրբելյանը նկատի ուներ հարևան սելջուկ-թուրքական ամիրայությունները, որոնք պարբերաբար ասպատակություններ էին կազմակերպում առավելապես հայկական իշխանությունների տարածքում: Մատթեոս Ուռհայեցին վկայում է, որ 1040 թ. Դավիթ Անհողինի վրա արշաված Շադդադյան Աբու-լ-Ասվարի ջախջախմանը, Անիի Հովհաննես-Սմբատ թագավորի միջամտությամբ, Սյունյաց 2000-անոց զորքով մասնակցեց նաև Սրմբատ II-ը²²: Բնական է, որ հատկապես այս հաղթական արշավանքից հետո ավելի էր բարձրանալու Սյունիքի ռազմաքաղաքական դերը միջֆեոդալական հարաբերությունների ասպարեզում²³: Սմբատի օրոք Սյունյաց լեռնաշխարհում ծավալվում են շինարարական աշխատանքները, ծաղկում է ապրում նահանգի հոգևոր կենտրոնը՝ Տաթևի վանքը: Այս գահակալի աջակցությամբ Հովհաննես մետրապոլիտը շարունակում է ընդլայնել վանական կառույցներն ու կալվածները: «Յամի յորում էր ք[ուականն] ՆՂԲ (1043),— կարդում ենք Տաթևի վիճագրերում,— ի քաղաւորութեան Սմայատա՝ ուրդո Աշոտո, ես տր Յովանէս շինեցի զսրահս ազնականութեամբ Սմայատա, ուր [ա]ղաւթէ յիջեցէի ի ՔՍ»²⁴:

1044 թ. վերստին խոռովեց հայոց լեռնաշխարհը. օգտվելով Անիի թագավորության անկումային վիճակից, Արդաբեյի, Ահարի և Թալիշի ամիրայությունների զորքերը ավարսուռության նպատակով հանկարծակի ներխուժեցին Սյունիք²⁵: Սմբատ II-ը միայնակ անկարող գտնվեց դիմագրավել թշնամուն և խուսափեց ճակատամարտից: Ասպատակ սփռելով ամենուր, հրոսակների խաժամուժը թալանեց ու հրկիզեց Սյունիքի բնակավայրերը, կործանեց հոգևոր-մշակութային օջախները:

¹⁸ Վասակ թագավորի բույրն ամուսնացած էր «ի նոյն Սիսական տունէ» սերված Աշոտի հետ, որն «էր իշխանաց իշխան ամենայն քաղաւորութեանս Սիսեաց» (Ստ. Օրբելյան, էջ 233). Աշոտը (Աշոտիկը) թաղված է Վահանավանքի մեծ տաճարի սյունասրահում:

¹⁹ Ստ. Օրբելյան, էջ 224:

²⁰ Նույն տեղում, էջ 233:

²¹ Նույն տեղում:


²² Մատթեոս Ուռհայեցի, Ժամանակագրություն, թարգմանությունը, ներածությունը և ծանոթագրությունները Հր. Բարթիկյանի, Երևան, 1973, էջ 53—54:

²³ «Հայ ժողովրդի պատմություն», հատ. III, Երևան, 1976, էջ 124:

²⁴ «Դիվան հայ վիճադրության», պրակ II, էջ 19:

²⁵ «Հայ ժողովրդի պատմություն», հատ. III, էջ 124:

Հետագայում երկրի վերականգնանացման գործում լայն մասնակցություն են ունենում, ի թիվս այլոց, «և տէր Ամբատ և տէր Գրիգոր»²⁶, որոնց նյութական աջակցությամբ Հովհաննես մետրապոլիտը ոչ միայն վերակառուցում է Տաթևի վանքը, այլև ավելացնում է վանական միաբանության անդամների թիվը²⁷: Ահա նաև այս ժամանակ է Տաթևի հոգևոր-կրթական կենտրոնն աչքի ընկնում, «անյաղթ փիլիսոփայիւք և աննման երաժշտօք, նաև յոգնաւատիկ



Նկ. 3.

արհեստաւորօք»²⁸: 1046 թ. Տաթևի վանքն ամբողջությամբ վերականգնված էր²⁹: Նույն թվականին հիմնովին վերակառուցվում է Սյունյաց մայրաքաղաք Կապանի ամենախոշոր վանական համալիրը՝ Վահանավանքը, որի մեծ տաճարի հարավային սյունասրահի մեջ առ այսօր պահպանվում է շինարարական բրնձնութի արժեքավոր հիշատակագրությունը:

Նորահայտ տապանաքարի թվագրության համաձայն Սմբատ II-ը վախճանվել է հայոց Շ (1051) թ.՝ Սյունյաց գահին բազմելով ոչ թե 4—5, այլ 11 տարի: Այսպիսով, Սմբատ II-ի զահակալության տարիներ պետք է համարել ոչ թե 1040—1044³⁰, այլ 1040—1051 թթ.³¹:

Սմբատ II-ի տապանաքարի կողքին՝ արևելքից, 1976 թ. հոկտեմբերին հայտնաբերվեց նաև մեկ ուրիշը, նույն կաթմրավուն գրանիտից կերտված ուղղանկյուն սալաքար, որ ունի 6 տողանոց հետևյալ կցագիր արձանագրությունը (նկ. 3):

ՍՈՓԻ ԱՂՎԱՆԻՑ ԹԱԳՈՒՀԻ ԶՈՔԱՆԶ³² ԳՐԻԴՈՐԻ ԹԱԳԱՒՈՐԻ ՈՐԴՈ ԱՆՇՈՏԿԱ ՄԱՅՐ ՇԱՀԱՆԴԵՏՈՆ: ԹՎ[ԱԿԱՆԻՆ] / ՇԼ (1081):

²⁶ Ս տ. Ս ր ք Ե լ յ ան, էջ 230:

²⁷ Նույն տեղում, էջ 229:

²⁸ Նույն տեղում:

²⁹ Նույն տեղում, էջ 230:

³⁰ «Հայ ժողովրդի պատմություն», հատ. III, էջ 124:

³¹ ՏՆՍ ժողատմա-բանասիրական հանդես, 1976, № 4, էջ 160:

³² Պոֆանե՝ բառի վաղագույն հիշատակությունը վիճագրության մեջ:

Տապանադրից որոշակիորեն իմացվում է, որ Սոփին եղել է. ա) Աղվանից թագուհին, բ) Սյունիքի իշխանաց իշխան Աշոտի որդի Գրիգոր թագավորի զորանշը, գ) Շահանդուխտ թագուհու մայրը, դ) մահացել է հայոց ՇԼ (1081) թ.: Ուսումնասիրողներից շատերը, վկայակոչելով պատմական սկզբնաղբյուրները, իրավացիորեն գտնում են, որ «Սոփին եղել է Աղվանից թագավորազն Սևադայի կինը և Սենեքերիմ 1-ի մայրը»: Հր. Աճառյանը այս Սեվադային համարում է «Կապանի թագավոր»³³. Եթե խոսքը վերաբերում է Բաղաց Կապանին՝ ապա նրա ենթադրությունը աղբյուրներով չի հաստատվում: Հայտնի է, որ XI դարի 80-ական թթ. Սևադա Կրտսերը (Սահակ Սևադա 1-ի թուր), հետապնդվելով խաչեն ներխուժած սելջուկ-թուրքերից, կնոջ՝ Սոփիի հետ ապաստանել էր Սյունյաց մայրաքաղաք Կապանում իր դուստր Շահանդուխտ թագուհու և Սյունյաց գահը ղեկավարած Սենեքերիմ որդու մոտ: Ներսիսյան հետ Կապան էր ժամանել նաև Աղվանքի Ստեփանոս կաթողիկոսը, որի հիշատակագրությունը պահպանված է վաճառականների կրկնահարկ դամբարան-եկեղեցու արևմտյան մուտքի աջ կողմում ուղղահայաց կանգնեցված կոթողի վրա: Այս արձանագրությունից որոշակիորեն պարզվում է, որ Աղվանքի հոգևոր առաջնորդը Կապան էր եկել «նեղեալ ի Տանկաց» (իմա՝ սելջուկ-թուրքերից)³⁴:

Բ. Ուլուբաբյանն ուշագրավ փաստերի համագրումով պարզել է, որ Սեվադա Կրտսերը Փառիսոսի շուրջ մեկ դար գոյատևած թագավորության գահակալներից էր: Այդ թագավորությունը «խորտակվեց 1048 և 1072 թվականների միջև»³⁵, Փաղունի արշավանքի ժամանակ: Եվ ահա Փառիսոսի Առանշահիկ տերերը, թեկուզ և ժամանակավորապես, «ստիպված էին լինում հեռանալ իրենց տիրույթներից, ապավինել Արցախին ու Սյունիքին, Ուտիքի լեռնային գավառներին ու Հայաստանի մյուս ապահով նահանգներին»³⁶: Ուսումնասիրողի ենթադրությամբ Աղվանից Ստեփանոս կաթողիկոսը «Բաղաց Կապան է փոխադրվել 1086—1096 թթ. միջև»³⁷, Հավանաբար այս ժամանակամիջոցում, կամ դրանից փոքր-ինչ վաղ, Սյունյաց մայրաքաղաք են եկել խաչենի իշխաններից շատերը, իսկ Սենեքերիմի և Շահանդուխտի ծնողները՝ Սևադա Կրտսերն ու Սոփին, իրենց թագակալ որդու մոտ են ապաստանել XI դարի 70-ական թթ.: Սոփի թագուհու մասին նշված է նրա որդու՝ Սենեքերիմ Սյունյաց թագավորի 1085 թ. հրամանագրերից մեկում, որով կարգադրվում է իր նվիրատվության դիմաց պատարագներ մատուցել «...զքսան օրն թագուհին Գրիգորոյ՝ որդւոյ Աշոտոյ, և զքսան օրն իմ մօրն Սոփիայ...»³⁸:

Սոփիի նորահայտ տապանաքարի արձանագրությունը հնարավորություն է տալիս ամբողջությամբ վերականգնել վաճառականների ղեղաքանդակ խաչքարերից մեկի եզրերին փորագրված միատող, պակասավոր հիշատակագրությունը, որը նոր վերծանությամբ կունենա հետևյալ պատկերը.

33 Հ. Ա. Աճառյան, Հայոց անձնանունների բառարան, հատ. Գ, Օրևան, 1948, էջ 434:

34 «Գիտնական հայ վիճագրություն», պրակ 11, էջ 139:

35 Բ. Ուլուբաբյան, խաչենի իշխանությունը X—XVI դարերում, Երևան, 1975, էջ 95:

36 Նույն տեղում, էջ 96:

37 Նույն տեղում, էջ 97: Հատ Ալիշանի Ստեփանոս կաթողիկոսը վախճանվել է 1091 թ. (տե՛ս «Սիսական», էջ 296):

38 Ստ. Օրբելյան, էջ 237:

«ՔՍ ԱԾ ՈՂՈՐՄԵԱՅ Ի ՔՈ Ի ՄԻԻՍ ԱՆԳԱՄ ԳԱԼՈՍԵ[Ա]Ն [ԹԱԳՈՒՆԵԱՅ ՍՈՓԷ] ՄԱԻՐ ՇԱՀԱՆԴԽՏՈ [ՍԵՆԱՔԱՐ]ԵՄԱ ԵՒ ԿԱՏԱԻՆ. ԹՎ[ԱԿԱՆԻՆ] ՇԷ (1081)»³⁹:

Ինչպես տեսնում ենք, այս խաչքարը կանգնեցվել է Սոփի թագուհու մահվան տարին՝ 1081 թ.:

Սյունիքի յոթ գահակալների ցանկում առանձնակի տեղ է գրավում Սըմ-



Նկ. 4.

բատ II-ին հաջորդած Գրիգոր I թագավորը, որի մասին հավաստի տեղեկություններ են պահպանվել մատենագրական և վիմագրական աղբյուրներում: Նրա տապանաքարը (լայն. 104 սմ, երկարությունը հայտնի չէ, քանի որ արեմուտքից դեռ ծածկված է փլատակներով) գտնվեց սյունասրահի արևելյան հատվածում, «Հրանոշի» դամբարանին կից և ունի միջին մեծության տառերով փորագրված քառատող արձանագրություն (նկ. 4):

ԹՈՒԱԿԱՆ:Շ:Ի: յԱ: (1072). ԳՐԻԳՈՐ ԹԱԳԱԻՈՐ ՈՐԳԻ՝ ԱՇՈՏԿԱՅ:

Գրիգորի անունն առաջին անգամ հիշատակված ենք տեսնում Սյունյաց Վասակ թագավորի 1019 թ. հրամանագրերից մեկում, ուր նա ավագ եղբայր Սմբատի հետ իբրև նվիրատվության վկա ստորագրում է այդ փաստաթուղթը. «Ես Գրիգոր որդի Աշոտի իշխանաց իշխանի վկայ եմ իմ քեռույս աստուածապահ թագավորիս հրամանացս»⁴⁰, 1040 թ., երբ Սյունյաց գահին բաղմեց Սըմ-

³⁹ Արձանագրությունը նախկինում վերծանվել է հետևյալ կերպ. «ՔՍ ԱԾ ողորմեայ ի քո ի միս անգամ գալստեան... մաւր Շահանդիտո... եւ Կատաին» (տե՛ս «Գիվան հայ վիճագրության», սյրակ II, էջ 138):

⁴⁰ Վահանավանքի պեղումների նախնական արդյունքներին նվիրված մեր հոդվածներից մեկում (ՀՅՍՀ ԳԱ «Լրաբեր» (հաս. գիտ.), 1970, № 10, էջ 91) նշել ենք, որ իշխանաց իշխան Աշոտի (Աշոտիկի) կողքին, հյուսիսից, թաղված Գրիգորը նույն ինքը Գրիգոր I թագավորն է: Որ հանգչում է հոր անյունին կից, սակայն, ինչպես տեսնում ենք, նորահայտ տապանագիրը հերքում է մեր նախկին կարծիքը:

⁴¹ Ստ. Օրբելյան, էջ 224:

բառ II-ը, Դրիգորը նշանակվեց «իշխանաց իշխան Սիսակտն աշխարհիս»⁴², իկդ րարձր պաշտոնը նա զրադեցընեց մինչև 1051 թ., այսինքն՝ եղբոր մահվան տարին, իսկ այնուհետև հռչակվեց Սյունիքի թագավոր⁴³:

Ի տարբերություն եղբոր՝ Սմբատ II-ի. Գրիգոր I-ը եղել է մեղմ քաղաքականության կողմնակից և հիմնականում զրուղվել է խաղաղ շինարարական աշխատանքներով: Դեռևս իշխանաց իշխան եղած ժամանակ, 1046 թ. ամբողջությամբ վերանորոգել է տալիս Վահանավանքը, 1062 թ. արդեն «բրիստոսապսակեալ արքա» Գրիգորը նյութապես աջակցում է Բղենո նորավանքի առաջնորդներին՝ հիմնովին վերակառուցելու հայ գրչության նշանավոր այս օջախը: Իր կնոջ՝ Շահանդուխտ թագուհու հետ նա մեծ ուշադրություն է նվիրում Սյունյաց լեռնաշխարհի մշակութային կյանքի զարգացմանը, Սյունյաց թագավորության քաղաքական հիմքի կայունությանը և ամրապնդմանը:

Դրիգոր I-ի տապանագիրը հնարավորություն է տալիս ստույգ թվագրելու նրա գահակալության տարիները. եթե Սմբատ II-ը մահացել է 1051 թ., իսկ Դրիգոր I-ը՝ 1072-ին, նշտնակում է վերջինս գահակալել է 21 տարի (1051—1072 թթ.) և ոչ 44, ինչպես ընդունված էր մինչև վերջերս հայ պատմագիտական գրականության մեջ: Քննարկվող վիմագիրը հերքում է նաև այն կարծիքը, ըստ որի Դրիգորի հաջորդ Սենեբերիմ թագավորը գահակալել է 1084 թ.: Իրականում այս թագավորը Սյունյաց գահին է բաղմել 1072 թ., Գրիգոր I-ի մահից հետո:

НАДПИСИ ИЗ РАСКОПОК ВААНАВАНКА 1970—1978 гг.

Кандидат историч. наук Г. М. ГРИГОРЯН

(Резюме)

Монастырь Ваанаванк—один из крупнейших духовно-культурных центров средневекового Сюника, в X—XII вв. одновременно являлся усыпальницей престольных князей Дзагикянов, Ашотянов и других правящих домов. О существовании интересующей нас усыпальницы впервые упоминает крупный историк XIII столетия сюникский митрополит Степанос Орбелян. При раскопках последних лет Капанской археологической экспедицией были обнаружены несколько гробниц местных вельмож с эпитафиями. Среди публикуемых здесь надписей особого внимания заслуживают эпитафии сюникских царей Смбата Второго (1040—1051), Григора Первого (1051—1072), царицы Софнии (1081 г.), настоятелей монастыря Ваанаванк Степаноса (1033 г.), Григора (1102 г.) и др.

⁴² նույն տեղում, էջ 233:

⁴³ նույն տեղում:

⁴⁴ «Դիման հայ վիմագրության», պրակ II, էջ 45: